



Fundasaun Mahein (FM), 27 Agustu 2021

Komunikadu Imprensa

PNTL no Seguransa Umanu iha Timor-Leste

Iha tinan 2012 Assembleia Jeral Nasoens Unidas nian liu husi Rezolusaun 66/290 de 10 Setembru marka pasu significativu ida hodi aplika segurana umanu (*human security*). Iha ne'ebe Assembleia Jeral ONU konkorda ho konsensus katak seguransa umanu maka aproximasaun ida atu ajuda Estadu membru sira identifika no infrenta dezafiu sira ne'ebé sociedade hasoru relasiona ho sira nia sobrevivensia, moris loron-loron no dignidade nia povu sira. Nosaun husi seguransa umanu – konsentra iha ema nia moris, direitu, liberdade no dignidade, livre husi ki'ak, livre husi tauk no oportunidade hanesan goja nia direitu sira. Katak seguransa umanu konsentra iha ema (umanu), komprensivu, kontestu espesifiku no resposta sira orienta ba prevensaun hodi haforsa protesau no empoderamentu ba ema no comunidade hotu.

Timor-Leste hanesan hanesan Estadu membru no hola parte iha rezolusaun sita iha leten ne'e. Atu hatan ba dezafiu no kompleksidade sira ne'e, la'os institusaun ida nian maibe integradu no husi institusaun oin-oin, inklui Polísia Nasional Timor-Leste (PNTL). Tuir Lei PNTL maka forsa seguransa ida ne'ebé iha misaun atu defende legalidade demokrátiku, garante seguransa sidadaun no bens nian no proteje direitu sidadaun ho estratéjia no filozofia polisiamentu, polísia komunitária.

Polisia komunitária maka filozofia no estratéjia organizasaun ne'ebé suporta parseiru foun entre polísia ho comunidade. Iha kontestu seguransa umanu (*human security*) ne'ebé konsentra iha ema no nia moris loron-loron, liberdade no seguransa no direitu ema nian. PNTL adopta estratéjia foun ne'ebé simu husi filozofia no doutrina polisiamentu PNTL hodi involve comunidade iha asaun sira seguransa no trata asuntu sira ne'ebé liga ho comunidade nia seguransa, estratejia ida maka Konsellu Polisiamentu Komunitaria (KPK).

KPK maka forum iha ne'ebé polísia ho comunidade bele tuur hamutuk hodi identifika, diskuti no halo asaun ba problema sira ne'ebé mosu iha comunidade nia leet. Liu-liu problema sosiu-ekonómika no problema sira ne'ebé fó risku ba comunidade nia moris no kriminalidade. Atu identifika problema sira comunidade nian liu husi enkontru regular sira, diskute no buka solusaun. Monitorizasaun FM nian nota pontu save sira iha enkontru KPK nian maka identifika ba problema sira hanesan falta bé mos, menus ai-han, disputa rai entre membru comunidade sira, asuntu saúde públika sira, menus profesores no facilidade sira eskola nian. Nune'e mos problema sosial no ekonómika seluk ne'ebé afeta direta ba comunidade nia moris. Inklui problema komum seluk ne'ebé potencia mosu konfliktu ka violênsia ne'ebé involve juventude sira iha grupu arte-marsiais nomos violênsia ne'ebé hasoru ema vulniravel sira. Problema sira ne'ebé KPK identifika – membru KPK

sira buka solusaun imediata kedas hodi responde. Ezemplu, halo mediasaun ba disputa sira hanesan disputa rai, plantasaun, animal inklui mos kazu sira krize semi-públiku. Maibe kazu krime públiku sira hanesan violênsia domestika, violênsia seksual (inklui hasoru ema ho difisiensia, menor idade no kazu inestu) no kazu krime públiku seluk, membru KPK sira hamutuk ho OPS halo kedas asaun kontinuasaun hodi refere ba autoridade competente sira tuir justisa formal nia dalan.

Lisaun importante ida husi pandemia Covid-19 nu'udar asuntu seguransa umanu (*human security*). PNTL simu kompênsia husi Governu hodi asegu implementasaun medida sira prevensaun no kombate pandemia Covid-19. PNTL nia asaun iha prvensaun no kombate Covid-19 hatudu oinsa PNTL enkorpora ninia polisiamentu iha realidade foun seluk ne'ebé fó ameasa ba seguransa ema nian (*human security*). Maske PNTL iha limitasaun oin-oin no la iha polítika ne'ebé klaru no meius ne'ebé suporta PNTL nia polisiamentu orienta ba asuntu espesifiku sira seguransa umanu nian.

Rekomendasaun

Asuntu seguransa umanu (*human security*) – PNTL iha ona diresaun ne'ebé orienta husi filozofia no doutrina polisiamentu nian – hodi hatan ba kestaun sira seguransa umanu. Liu-liu estratéjia polisiamentu nian ne'ebé orienta ba ema no comunidade nia seguransa hodi identifika problema no solusaun sira ne'ebé konsentra iha ema nia moris, liberdade, seguransa no direitu sira.

Hodi haree kle'an ba asuntu sira seguransa umanu – Timor-Leste prezisa Política Seguransa Nasional ida hodi trata asuntu sira ne'e ho komprensivu. Nune'e mos enkorpora seguransa umanu iha Política Seguransa Nasional no tarefa sira ne'ebé involve setor seguransa iha asuntu seguransa umanu. Pandemia Covid-19 fó lisaun importante ba setor seguransa, liu-liu PNTL nia involvimentu nu'udar ajente *frontline* iha asuntu sira seguransa umanu nian.

Atu hetan informasaun kle'an liu kona-bá asuntu ne'e bele kontaktu:

João Almeida

Director

Email: almeidamahein@gmail.com

Telemovel: (+670) 7756 1184

Website: www.fundasaunmahein.org